

# Pahang akan warta 134,183 hektar tanah sebagai rizab Harimau Diraja Al-Sultan Abdullah

Julai 28, 2023 @ 10:46pm



Pemangku Raja Pahang Tengku Hassanal Ibrahim Alam Shah Al-Sultan Abdullah Ri'ayatuddin Al-Mustafa Billah Shah (tengah) berkenan bergambar bersama sebahagian para peserta pada majlis penutup 1st Pahang Tiger Summit 2023 hari ini.

KUANTAN: Kerajaan Pahang sedang dalam proses mewartakan kawasan seluas 134,183 hektar tanah rizab bagi Harimau Diraja Al-Sultan Abdullah menjelang akhir 2028.

Pengerusi Jawatankuasa Kerajaan Tempatan, Perumahan, Alam Sekitar dan Teknologi Hijau Pahang, Datuk Seri Johari Harun, berkata fasa pertama usaha itu

meliputi kawasan seluas 92,649 hektar membabitkan keseluruhan kawasan Hutan Simpan Gunung Aais di Jerantut.

Katanya, rizab tambahan sebagai Hutan Perlindungan Hidupan Liar telah diwartakan melalui notis bertarikh 4 Mei tahun ini, manakala selebihnya akan dilaksanakan dalam fasa dua membabitkan Hutan Simpan Tekai-Tembeling.

"Ia adalah sebahagian daripada inisiatif kerajaan Pahang melalui Jabatan Perhutanan negeri untuk meningkatkan populasi Harimau Malaya dan kawasan merayau mereka, sekali gus mengelak konflik antara manusia dan hidupan liar.

"Tanah rizab ini adalah inisiatif pemuliharaan Harimau Malaya yang pertama di Malaysia dan sebenarnya kawasan rizab ini akan menjadi sebahagian daripada projek kredit karbon di bawah skim Kumpulan Wang Hutan Malaysia sebagai salah satu daripada banyak usaha untuk meningkatkan pemuliharaan hutan secara kolektif," katanya.

Beliau berkata demikian ketika menyampaikan ucapan pada Sidang Kemuncak Harimau Pahang Pertama di sini, hari ini, yang turut hadiri oleh Pemangku Raja Pahang Tengku Hassanal Ibrahim Alam Shah Al-Sultan Abdullah Ri'ayatuddin Al-Mustafa Billah Shah.

Dalam ucapannya, Johari berkata beliau dimaklumkan kini terdapat kurang daripada 150 ekor Harimau Malaya di Malaysia, dengan 39 daripadanya berada di Pahang.

Johari berkata, kerajaan Pahang mengambil langkah serius dalam melindungi hidupan liar termasuk Harimau Malaya, dengan melaksanakan pelbagai inisiatif untuk memelihara hutan.

"Sehingga 2021, kawasan berhutan di Pahang berjumlah 2.04 juta hektar, mewakili 57 peratus daripada kawasan negeri ini. Kawasan hutan ini termasuk Hutan Simpan Kekal, Hutan Perlindungan dan Hutan Tadahan Air.

"Dengan ini, Pahang telah menjadi penyumbang terbesar kawasan hutan di Semenanjung Malaysia," katanya.

Sementara itu, Menteri Sumber Asli, Alam Sekitar dan Perubahan Iklim, Nik Nazmi Nik Ahmad, berkata Harimau Malaya berada di ambang kepupusan kerana populasinya berada pada tahap membimbangkan dan akan pupus dalam tempoh lima hingga 10 tahun akan datang, jika langkah luar biasa tidak diambil.

Sementara itu, Menteri Sumber Asli, Alam Sekitar dan Perubahan Iklim Nik Nazmi Nik Ahmad berkata Harimau Malaya berada di ambang kepupusan kerana populasinya berada pada tahap membimbangkan dan akan pupus dalam tempoh lima hingga 10 tahun akan datang, jika langkah luar biasa tidak diambil.

"Bertindak atas perkara ini, Kabinet Malaysia pada 2021, bersetuju dengan sembilan tindakan luar biasa bagi pemuliharaan Harimau Malaya untuk tempoh 10 tahun, bermula dari 2021 hingga 2030.

"Tindakan luar biasa itu berdasarkan tiga pendekatan iaitu pengukuhan di peringkat akar umbi dan pemuliharaan habitat Harimau Malaya, menambah baik tadbir urus dan keberkesanan dalam pelaksanaan usaha pemuliharaan dan memantapkan inisiatif untuk memastikan kemandirian spesies Harimau Malaya melalui penyediaan instrumen kewangan yang inovatif dan habitat Harimau Malaya skim akreditasi," katanya dalam ucapan yang dibacakan oleh Ketua Setiausaha Sumber Asli, Alam Sekitar dan Perubahan Iklim Datuk Rosli Isa.

Nik Nazmi juga memaklumkan kementerian turut memgambil tindakan strategik menangani krisis populasi Harimau Malaya dengan kerajaan Pahang, seperti menubuuhkan Pasukan Petugas Kebangsaan Bagi Konservasi Harimau Malaya (MyTTF) pada tahun lalu.

Selain itu, Program Perlindungan dan Rondaan Biodiversiti (BP3) diperkuuhkan yang antara lain menyaksikan 302 Renjer Komuniti dilantik tahun ini dengan peruntukan RM9 juta.

Pusat Konservasi Harimau Malaya juga ditubuhkan di Lanchang, Temerloh pada 1 Feb 2022 bagi menjalankan program pembiasan haiwan itu secara berfokus.— BERNAMA